

Sicole

L' aplacaedje (*formation d'un mot composé*)

On mot d' aplacaedje, c' est on mot fwait avou deus bokets, raloyîs d' ene façon u d' l' ôte.

Aplacaedje ordinaire

E walon come e francès (et dins les ôtes lingaedjes romans), les deus mots, c' est des sustantifs [*substantifs, noms communs*] ki s' metèt onk dirî l' ôte, avou ene divancete. Li prumî boket s' lome « diterminé », li deujhinme « diterminant ».

Egzimpes : ene boesse âs letes ; ene fôre âs lives ; on tchén d' vatche ; ene oto d' coûsse ; li lingaedje del mame [*langue maternelle*] ; li Sint Impire romin djermanike.

Ça sait esse on no avou èn addjectif ; si l' addjectif est « novea » (vinant direk do francès) i s' mete padrî :

Egzimpes : ene sicole comunåle ; l' ôre [*ordre*] alafabetike ; lingaedje nâcionå (= langue nâcionåle) ; li scole prumaire.

Si l' addjectif est « vî », on l' mete padvant :

Egzimpes : on prumî minisse ; on sâvadje no (no sôbriket) ; on sâvadje lapén (mins on dit ossu on lapén sâvadje).

Aplacaedje contraire (= aplacaedje tîxhon [*germanique*])

Dins les lingaedjes djermanikes, copurade li neyerlandès et l' almand, l' aplacaedje si fwait a l' evier : li « diterminant » divant l' « diterminé ».

Egzimpes : *brievenbus* (boesse âs letes), *boekenmarkt* (fôre âs lives), *landtaal* (lingaedje do payis), *moedertaal* (lingaedje del mame).

E walon, gn a kékes kimons nos insi : viermolou (molou des viers), ene pî-sinte (pazea po-z aler a pî) ; li mwin-levêye (levêye di mwin ki ratneut ene ipoteke).

Mins, gn a ene peclêye di nos d' plaeece (toponimes).

* avou -mont : Librâmont, Bougnimont, Rinâmont, Grimbiemont, Gribâmont, Bernimont, Åcrumont, Tchanmont (Viance), Arbûmont.

* avou -pré : Lompré, Amîpré, Måbonpré, Målimpré, Noyaipré (Rindeu)

* avou -pont : les Nûponts (Almå) ; Tchârlupont (Viance)

* avou -fwè : Rebefwè (Viyançe), Baconfwè, Djerbaifwè, Nargâfwè, Ronfwè (Ôtchamp)

* avou -veye : Tchonveye (Tchonviye), Veskeveye, Årveye (Aurvaye).

Eciclopedeye

Li codânaedje del sovnanche

(Souzane Mahin)

Li codânaedje del sovnanche, c' est ene politike des djins ki sont-st å pouvwer dins on metou payis (sovint on dictateur), po disfacer totes les sovnanches des cis k' estént conte di zels et k' il ont dedja fwait disparexhe (assaziné).

C' est ene atuze k' a skepyî do trevéns des Romins. Ele s' î lomève e latén «*Damnatio memoriae*».

Egzimpe dins l' Empire romin

L' an 211, l' impreur Septime Severe aveut lomé ses deus fis Caracalla et Gueta po-z esse impreurs tot les deus eshonne. Mins i n' s' etindént nén. Adon, Caracalla a touvé s' fré. Mins les cis k' estént po Gueta (metans dins l' ârmêye) avént co sovnanche di lu et s' alént motoit revinter conte di Caracalla. Adon, ci-ci distrujha totes les posteures di s' fré, martoker si vizaedje ezès graeveures, et fé touwer des meyes et des meyes di ses shuveus.

Egzimpe e l' Rûsseye d' asteure

L' afwaire Alexey Navalni mostere clairmint on codânaedje del sovnanche pa Vladimir Poutine. Onk ki cåze di Navalni sins dire ki s' est on terrorisse pout esse metou al prijhon. Avou ça ki Poutine ni dit måy si no divant les djins: i dit «cist ome la» u «on parey».

Houte di çoula, si on cwirt après des racsegnes sor lu sol Daegntoele on n' trouve rén (pask' elle ont stî cinsurêyes); et minme on sait esse porshuvou.


Egzimpes rishonnants, après mon nozôtes

Dinltins, e l' Beldjike, les cours d' istwere ni les ârtikes di gazete ni cåzént bråmint des biestreyes des rwès. Ki Yopôl prumî aveut arivé rwiné, ey aveut rdivnou ritche tot montant li « *Société Générale de Belgique* ». Ki Yopôl deus esteut èn ome âs femes. Å Congo (k' esteut da sinne come vosse corti est da vosse), gn âreut yeu, sorlon les Inglès, deus miyons d' moirts, paski les Congolès ni vlént nén aler ovrier dins les plantisses d' âbes å cawoutchou. Et awè les mwins còpêyes po ça.

El Federâcion Walonreye-Brussele, aprume a l' RTBF, on dit li pus râlmint possible li no « walon » et « Walonreye ». On a tapé âs riketes totes les ârtchives des emissions e walon. Et clôre l' RTBF-Nameur.

Sicrijheu d' on djoû

Jules Baquet



Jules Baquet, a vnou å monde al Vå-Sinte-Ane li 27 di djulete 1905. I mora cintnaire li 6 d' octôbe 2005.

I riscrijha lu-minme li fåve do vî vî tins ki shût, k' i tneut di s' mononke-tåye [*grand-oncle*], et k' racontéve si mononke, li Blanc Djôzef (Jean-Joseph Baquet), k' a stî mayeur deL Vå di 1892 a 1921.

Les mehins do dierin leu deL Vå

Dinltins, on-z aveut foirt peu des leus paski, cwand il estént a binde, il ataként tolminme kî et tolminme cwè. Mins on nd aveut tant touwé k' i gn aveut pupont d' bindes et l' ci ki dj' vou dire esteut tot seu. Après on foirt ivier, il aveut yeu fwin. Tene come ene plantche, il aveut divnou flåwe, et couyon, avou.

Mins l' bontins esteut rivnou, et i contéve esse schapé. Et i s' pormoennéve e Trô do Rnåd. Et vo l' la ki tchait so on live prins al bricole. I s' raletchive dedja, mins la k' i rleve si tiesse, et i voet on grand demon d' singlé ttossu près do live ki lu.

On gros singlé avou des brokes come ça, et ki n' aveut nén l'air d' aveur sofrou d' l' ivier, lu. A ! si ç' åreut yeu stî cwand il estént ene binde, i l' åreut yeu levé, m' singlé. Mins asteure...

Cwè fé ? Et i crevéve di fwin.

Mins vo n' la-t i nén k' ådzeu d' zels, bén ashît so ene coxhe di tchinne, gn a on spirou ki s' pete a rire divant l' sinne.

Et la l' singlé, vireus, ki boerleye :

- Taijhe tu, ti, po on toké ! Di nos purade çou k' i nos fât fé.

Mins li spirou, lu, i n' dimandéve k' a fé durer l' cayet, et minme a l' ecramyî.

- Gn a on plan, dijha-t i, c' est do fé vni on djudje.

Il aveut veyou on rnåd a céncwante metes, k' aveut sintou l' live, mins ki n' oizeut aprotchî.

- K' i vâye, derit i l' grand demoné singlé. C' est do houkî on djudje.

Ça fwait k' li spirou creye après li rnåd ki vént, tot s' dimefiyant tolminme. Cwand il arive dilé zels, i dit tot d' ene trake.

- C' est on laid cayet, savoz, ça, mes biesses. - i n' aléve nén dire mes djins, hin, ça s' coprind bén, dowô. C' est on laid cas po on novea djudje, aprindisse et novice. I m' fât des esperts.

- Si vos vloz, dj' endè va cweri.

Come i cnoxhe Bén l' Vå po-z î aveur sitî vnou dipus d' on côp scroter des poyes, i dischind li voye del Nouve Veye, et il arive å Pont d' Fier. Et il avize li vî tchén do molén. Et i lyi conte li spoûle.

- Ni vôreuss nén esse espert, ti ? dit-st i li Rnåd.

- K' i vâye ! dit-st i l' vî tchén do Molén. Vo m' la espert, pocwè nén ?

Mins il è fât co onk, et vla djustumint li tchet d' mon Modåve ki passe dissu l' vinta [*vanne*] et ki dischind tot do long des rows do molén. Et li rnåd lyi conte li spoûle.

- Ni vôreuss nén esse espert ? dit-st i li rnåd.

Li tchet n' est nén vî, et i sereut tot fir d' esse lomé espert.

- K' i vâye ! dit-st i l' tchet d' mon Modåve. Vo m' ci espert, pocwè nén ?

Mins so ç' tins la, gn aveut l' singlé et l' leu k' avént l' tins long. Et dmander å spirou d' aler vey so l' ôrire s' on n' voet nén co ariver li djudje et ses esperts.

Come dit come fwait. Et vola li spirou ki potche d' ene coxhe so l' ôte et divant wai d' tins, vo l' la rarivé.

Et i raconte çou k' il a veyou.

- Vo les la, mins kî k' est ! Li pus gros ramasse ene chôrcheye di pires tot vnant et l' pus ptit a on grand sâbe k' i tént å hôt, et k' est co pus grand k' lu.

Bén oyi, tchén ki rployive si xhaléye pate et l' tchet ki s' ricrestéve tant k' i dressive si cawe å hôt, li pus hôt k' i pleut.

Vo les la ås cwate cints côps [*très soucieux*], et docô, la k' i s' etindèt.

- Schoûte, dit-st i l' singlé. Dji m' va fé on trô po m' mete. Ti m' rascoverrès d' fouyas, tot leyant ene oraye foû, por mi ôre çou ki s' va passer. Et twè, mousse dins ç' ronxhisse la.

Et i fjhèt come il ont dit.

Et la les ôtes ki s' amoennèt. Todi piyane miyame.

- Téns ! dijhèt i, wice sont i, les ametous ?

Seulement, i vos fât dire k' i fjheut ene miete d' air et vla on foye ki tchait so l' oraye do singlé. Et ça l' catyive Et i fwait aler ene miete si oraye. Li tchet, lu, pinse ki c' est ene soris, et i zoupele dissu; si hagne-t i [*et il mord*] l' singlé on bon côp dins si oraye. Li singlé e voeyant ene si ptite biesse ki lyi fwait si tant do mâ, ni fwait ni ene ni deus et, hay evoye ! i pete å diale.

Li tchet, lu, e voeyant si lver ene si grosse biesse, gripe å tchinne, la k' i trouve li spirou et vo les la evoye onk après l' ôte.

Li leu, di s' ronxhisse, n' aveut nén coprindou grand tchoi, mins todi assez po fote si camp.